

Juez a manda e caso bek pa Juez Comisario haci mas investigacion

ACUSADO DFEN CASO DI FRAUDE DI MAS DI 32 MIL DOLLAR A WORDE LAGA LIBER TEMPORALMENTE

ORANJESTAD(AAN) -- Manera DIARIO a publica, ayera Corte den Promer Instancia a sigui cu tratamento di e caso penal contra e homber R.J.Q., kende ta ser acusa di a haci maniobranan cu e cartanan den Cristal Casino y asina laga un persona gana e suma di 32.308 Mil Dollar.

E acusacion ta sigui bisa cu durante e wega Caribben Stud, R.J.Q. a prepara e baraha di tal manera cu e homber R.S. a gana. Segun Fiscal, R.J.Q. tabata parti e cartanan di tal manera cu cada vez e tabata saca un carta di abao pa R.S. mientras cu pa e otro personanan y e mes e tabata saca carta di ariba.

Ayera Corte na dado momento a bira manera un teatro. Miembronan di Recherche, a instala un television y video pa asina pasa e video cu a worde graba den Cristal Casino. Juez mr. Vroom a concedi prensa e honor pa por a presencia e video aki, cual prensa ta aprecia tambe.

E abogado Moenir Alam na dado momento a protesta contra pasamento di e video ya cu e ta pretende cu esey no ta e video original.

Juez mr. Vroom a muestra Moenir Alam cu e video ta esun original y cu den e caso contra R.J.Q. su detencion, el a admiti cu loke a ser mira ariba e video ta loke a pasa.

**DESPEDIDA
NA
1270**

ORANJESTAD(AAN): Dialuna awor durante un ocasion special, gerencia di Radio 12270 lo despedi di dos di su empleadonan.

E prome ta Coby Alders cu ultimo añanan a actua como station manger y cu awor ta ocupando un puesto den gobierno.

E di dos ta Norma Wemet cu a traha casi 20 aña cu e emisora y cu tambe ta retira. Diavierna tin e recepcion na ocasion di inauguracion di FM 107.5

Ministerio Publico tambe a laga yama un testigo den e caso aki. Ta trata aki di e homber F.M. kende ta un casino manager di un di e hotelnan na Aruba y ta ser considera como experto.

El a splica Juez cu e mester sa e reglanan di e casino pa asina por determina si loke lo bay worde mira ariba e video ta fraude.

Ariba peticion di Juez, F.M. a splica cu tin reglanan normal pa cu e wega. Durante cu e video tabata pasando, el a señala cu tin diferente irregularidadnan, entre otro cu e dealer no mag di mishi cu e cartanan si no tin ningun hende sinta na mesa. F.M. ta haya cu e supervisor mester tabata para banda di R.J.Q. y mester a hala su atencion pa no haci tal.

Ariba e video por a mira na dado momento con R.J.Q. en berdad tabata saca carta

di abao pa R.S. siendo cu pa e otro hendenan e tabata saca di ariba. Esaki tambe segun F.M. no por. A constata tambe cu promer cu e R.J.Q. a cuminsa parti carta, el a laga un carta cu normalmente mester worde poni te abao di e baraha cay. Tambe por a nota cu na diferente ocasion, R.J.Q. tabata saca mas cu un carta y ta bolbe pone nan bek den e baraha pero na un worde masha straño.

En todo caso por a mira diferente movecionnan cu no tabata normal. Loke tambe tabata notable tabata cu ora R.S. a gana, no por a nota ningun expresion di alegria, siendo cu e hendenan na banda di dje tabata hopi emocionan y hasta a felicite.

F.M. a splica cu ora un persona gana cu Royal Flush, esaki mester worde constata pa e supervisor,

kende e ora ey mester yama e manager un duty, kende lo pidi e camera man pa controla si tur cos a bay bon y finalmente si tur cos ta bon, e ta duna orden pa paga.

Despues cu e video a ser pasa, tanto Fiscal, e acusado como e abogado a haci F.M. un serie di pregunta, caminda por a nota cu tanto e supervisorman y e manager un duty ta worde implica den henter e asunto aki. Juez na dado momento a pospone e caso pa 2'or di merdia pa asina e por caba di trata e otro casonan cu tabata pendiente ainda e mainta ey.

Merdia, e caso no a dura mucho ya cu Juez na dado momento, a dicidi di pospone e tratamiento ya cu e ta haya cu falta mas investigacion den e caso aki. El a manda e caso bek pa Juez Comisario cu e peticion pa laga scucha e supervisorman F.V. y V.K. tambe mester

scucha e pittboss F.O. y e ganador R.S.

A keda palabra cu lo continua tratamiento di e caso dia 25 di November 1994.

Abogado Moenir Alam a pidi Juez pa laga su cliente den libertad ya cu e tin 4 luna y 1 dia encarcela caba. El a sigui bisa cu no mester teme cu su cliente lo huy. Fiscal tabata contra di e peticion aki ya cu e ta haya cu e caso aki ta uno hopi serio.

Juez, despues di a pensa un rato, a dicidi cu ta pone R.J.Q. den libertad temporal, te ora cu sigui cu tratamiento di e caso.

Por a nota cu tabata reina alegria cerca e famianan di R.J.Q. cu tabata sinta den sala. DIARIO tabata tin oportunidad di papia cu R.J.Q. kende a expresa cu nu sonrisa na su cara: "Mi ta liber, liber". Dia 25 di November, DIARIO lo bay cubri e interesante caso aki.

POST PA MANDA, ENTREGA BO MES !!

